

الفاجومي

وعلى أرض الصحفيين سجلنا
هدفاً في مرمى الحكومة

- في حفلة نقابة الصحفيين لم نلتزم بالبرنامج.
- سأل ضابط الكمين الشيخ إمام وزميله: رايح فين يا راجل انت و هو؟.. قالوا له: و احنتا شايفين رايحين فين؟
- بعد ليلة «الندوة» بحارة الروم اتفرقت القعدة من حوش آدم.

obeyikan.com

اللى حصل فى حفله نقابه الصحفيين شيء ما ينحكيش ولا يتوصفش.. أنا طول
عمرى أقرأ عباره معينه وما افهمهاش.

يقولك المطرب الفلانى أو الملحن العلانى أو الممثل الترانى قال سيبقى خايف
وجتته بعيد عن السامعين والحاضرين بتبقى متلبشه وبيبقى راكبه ستين عفريت قبل
ما يقدم عمل جديد للامؤاخذه جمهور!

كلهم بيقولوا الحكايه دى من باب العياقه عشان لا مؤاخذه الست المذيعه تمصمص
شفايفها وتلعب حواجبها من حيل الدهشه وتقول:

- الله (ولازم اللام بتاعه لفظ الجلاله تبقى رفع الفتله وكذلك الطاء والصاد وكل
حروف التفخيم والتضخيم فى لغتنا الجميله فتنتطق كده)

تبعاً تبعاً هو ذا الفنان الأسيل.. دائماً متتير وخايف إنه لا كدر الله العمل بتاعه
يسأت.

أنا مش فاهم بيقولوا كده ليه؟! .. طب دا انت حتقابل ناسك اللى بتحبهم
ويحبوك.. فيه حد يخاف من لقا الأحبه؟!!



أنا من ساعه ما خرجنا من حوش آدم لغاية ما وصلنا مبنى نقابه الصحفيين وأنا
ريقى ناشف من الخوف... هو إحنا رايعيين نصطاد سمك؟

دا إحنا رايعيين نواجه الدوله بكل جبروتها وعلى ملعبها!

إحنا مجرد ما وصلنا باب مبنى النقابه مسكت الشيخ إمام من إيده وشديته (لأول
وآخر مره) بعنف عشان نستخبي فى الزحام الرهيب اللى كان بادى من الباب البرانى
ومتتهى على المنصه اللى ح نقعد عليها ونغنى.. حسيت بالدفا والأمان والقوه والعزم
الشديد.. الناس حلوه قوى يا جدع.. إيه الجمال دا كله؟ غابه حقيقيه من الزنود
والسواعد السمرا مرفوعه حوالينا وكأنها بتحمينا وابتسامات صافيه وفرحه فى

العيون محاوطانا من كل جانب.. إيه بقى اللي ممكن يخوفنا؟ نقلت الإحساس ده للشيخ إمام باللمس - لغتنا المشتركة دائماً لما بنبقى فى وسط الناس - لقيته انفرادى الوتر المشدود وبقى ماشي جنبى زي عود الزان لحد ماطلعنا المنصه بعد مجهود مضمنى بسبب الزحام فى القاعه.. وبعدها كل شيء اتبدد مع الخوف حتى البرنامج اللي كان موضبه الأستاذ رجاء النقاش بالنسبه للأغاني اللي حنقدمها ما قدرتش ألترزم بيه واتحولت المسأله إلى ما يطلبه المستمعون وكله خارج البرنامج حتى الطفله الجميله ليس رجاء النقاش اللي كان عمرها أقل من ستين طلبت "بقره حاحا" اللي كانت خارج البرنامج فقلناها..

المهم.. خلصت الحفله بهدف صاروخى سجلناه فى مرمى الحكومه بكل مؤسساتها الثقافيه والإعلاميه دون خسائر من جانبنا اللهم إلا إصابتين الأولى مست علاقتى بالأستاذ رجاء النقاش اللي اعتقد إنى خدعتة لما خرجت على البرنامج أمام إلحاح ما يطلبه المستمعون. والتانيه انهدت علاقتنا الفنيه بحسن الموجى نهائياً بعد ما عمل حاجه غريبه جداً وغيبه جداً.



أنا قلت قبل كده إن إمام ومحمد على كانوا كارفين حسن الموجى وأنا كنت مصمم على وجوده لمصلحه الشغل.. يوم حفله نقابه الصحفيين الصبح رحت جنبته من الشغل بالمحايله ورحنا الغوريه اصطبحننا وفهمت إمام إن حسن حيكون معنا فى الحفله فقبل على مضمض.. لكن كان فيه مشكله وهى عدم وجود رق لحسن.. قلت له على رق جمال الموجى فرفض.. قلت لإمام يستقضى لنا رق من حد قال لى: "ما أعرفش" خدت حسن ونزلنا على شارع محمد على أجبرنا رق باتنين جنبه فى اليوم وسبت بطاقتى الشخصيه رهن عند الراجل.. بعد الحفله أدور على حسن الموجى فى سلقط فى ملقط.. فص ملح وداب..

تانى يوم رحت له الشغل وسألته عن سبب اختفائه قال لى: "روح.. كنت تعبنا وروح" .. سألته عن الرق قال لى: "سبت ع المنصه بعد الحفله" قلت له:

- معقول ده يا حسن!

قال لي:

- اللي حصل

رحت لوحدي على شارع محمد علي وفهمت الرجل أن الرق انسرق وأنا
مستعد أدفع تمه وأخذ البطاقه قال لي:

- عشرين جنيه..

دورت في جيوبى ما لقيتتش غير ستاشر جنيه الرجل عدهم وقال لي:

- إيه دول؟

قلت له:

- دول كل اللي معايا.

راح مفاجئى بقلمين سخنين طيروا الشرار من عنيا وقال لي:

- دول بقى يفوقك ويبردوا نارى.

وراح رامى لى البطاقه ع الرصيف خدتها وطلعت أجرى وأنا عمال أقول:

- الله يخرب بيتك يا حسن يا موجى.. الله يخرب بيوتكو يا اولاد الكلب كلكو.

•••

أكثر من مره الشيخ إمام يقوللى:

- دا فيه جماعه حباينا عايزين يشوفوك.

وبعدين يطنش.. إلى أن كان يوم ساعه صبحيه وكنت قاعد لوحدي وكان إمام

ومحمد نايمين.. سمعت صوت بينده من تحت:

- يا شيخ إمام.. يا أستاذ نجم.. يا أهل الله ياللى فوق.

قلت له اتفضل.. شويه ودخل على راجل مكفوف، وعرفنى بنفسه:

- أخوك محمد عبيد.. اللي أنت مستكبر تيجى بيته..

قلت له:

- ليه بتقول كده؟

قال لى:

- هو الشيخ إمام مش بلغك؟

قلت له:

- جايز نسى.

قال لى:

- نسى ميت مره؟ والله لما يصحى لأملص ودانه.. عملت الشاى وقعدنا نشرب
وندردش لقيت نفسى أمام إنسان ذكى دمه خفيف وضارب الدنيا صرمه عن معرفه..
قال لى:

- إحنا يا سيدى كل يوم اتنين بالليل بيتلموا إخوانا المكفوفين عندى فى البيت
ونسهر صباحى وكلهم عايزين يشوفوك.

قلت له:

- طب إزاي؟

ضحك وقال لى:

- إنها لا تعمى الأبصار..

قلت له..

- صدق الله العظيم.

ويوم لتنين حطيت باطى فى باط الشيخ إمام وخذناها دأججه لحاره الروم..

●●●

بيت محمد عبيد «الندوه» ستاشر مكفوف بما فيهم محمد عبيد ومراته أم تهانى-

مكفوفه- فضلت أنا وتهانى اللى بتشوف طشاش.. إحنا المبصرين اللى فى الهلمه دى.. كانت ليله ممتعه فيهم حوالى سبعة بيعزفوا عود بشكل يخبل.. وكلهم بيغنوا وكلهم يقفشوا وينكتوا وكلهم بيشتغلوا فى القعه.. اللى ماسك إداره نار واللى بيعسل واللى بيعمل الشاى.. واحد فيهم بيدى باجور الجاز إيره ومحمد عبيد صاحب البيت خد عجله «سعد لاخرس» ونزل الغوريه جاب طلبات ورجع زى الجن ومحمد عبيد ده نوادره ماتتعدش..

كان مره خارج هو والشيخ إمام من حاره الروم قابلهم كمين فى باب الغوريه
سألهم الظابط:

- رايح فين يا راجل انت وهو؟

قال له:

- هو إحنا شايفين؟

قال له:

- معاكو حشيش؟

قال له:

- معاك أنت؟

طلع الظابط دمه خفيف وضحك واداله حته تيجى ربع قرش.. مسكها محمد عبيد وحطها على ودنه شويه وقال للظابط:

- دا حشيش حكومه.

قال له:

- إيش عرفك؟

قال له:

- شميته..

قال له:

- إنت بتشم من ودنك؟

قال له:

- وبشوف بقلبي.

.. المهم.. حوالى الساعه ثلاثه صباحًا قالوا عايزين نسمع تهانى بقى.. تهانى دى اللى أنا قلت لك بتشوف طشاش.. غنى يا تهانى.. وبدأت تهانى تغنى.

صوت هامس لازم تطرطق ودانك عشان تسمعه، ومجرد ما يدخل ودانك تضيع واسأل علاء الديب اللى انهطل من صوت تهانى وبقي ماشى يغنى على روجه.. «يا صجره ضلك عجبنى».

وبعد كده اتحولت القعدة من حوش آدم النص راح على حاره الروم فى حضن صوت تهانى والنص الثانى راح على محمد حجازى الأخ الأصغر للشاعر الكبير أحمد عبد المعطى حجازى وبالمناسبه محمد حجازى كانت ودنه الماظ وصوته شديد العذوبه وكان دائماً لما غزالته تروق يغنى لنا أصعب ألحان الشيخ إمام:

قيدوا شمعاه يا أحيه ونورولى

رمشتين من رمش عين

ويبندهولى

من هنا سكة ملامه

من هنا سكة ندامه

سكتين ياللا السلامه

أمشى فين

يا ناس قولولى؟

